



Universitätsbibliothek Paderborn

Domus Æternitatis

Reserata, Et Ad Ingrediendum Quotidie Memorïæ cogitationibus,
Intellectûs considerationibus, ac voluntatis affectibus Aperta ; Serviet
quoque pro Concionibus; uti & pro Exhortationibus, in Agoniae Domini
Sodalitatibus

Dirckinck, Johann

Coloniae Agrippinae, 1713

26. Æternitas Spiritûs Sancti.

[urn:nbn:de:hbz:466:1-50597](https://nbn-resolving.org/urn:nbn:de:hbz:466:1-50597)

CONSIDERATIO XXVI.

Æternitas Spiritûs Sancti.

Pater, Verbum & Spiritus sanctus.

1. Joan. c. 5. 7.

16. Martii.

I. **C**onsidera etiam *Spiritum sanctum* esse æternum; veluti Pater & Filius æternus est. *Æternus Pater, æternus Filius, æternus Spiritus sanctus*, ait S. Athanasius in Symbolo. Est autem æternus, quia à Patre & Filio, est spiratus ab æterno, & in æternum, sine cessatione aut interruptione spiratur. Adeoque Spirator est æternus; Spiratio est æterna; & spiratus est æternus; qui à Patre & Filio, tanquam ab uno principio & uno Spiratore, ab æterno procedit, & in æternum erit.

II. Pater est Spiritus, Filius est Spiritus, Spiritus sanctus est Spiritus: sed quia hic est utriusque nexus, utriusque amor, & quasi impulsio quædam dilectionis, Patris in Filium, & Filii in Patrem, hinc Spiritus sanctus meritò dicitur

208 *Domus eternitatis. Consideratio*
tur Spiritus : est enim Spiritus Patris , à
quo accipit suam divinitatem & omni-
potentiam : est Spiritus Filii , à quo ac-
cipit eandem divinitatem & sapientiam :
est Spiritus utriusque à quo procedit ut
amor.

III. Pater est Sanctus , Filius est San-
ctus , Spiritus sanctus , est Sanctus ; sed
huic peculiari ratione attribuitur , san-
ctitas , velut Patri omnipotentia , & Fi-
lio sapientia ; quia est charitas increata,
nexus amoris inter Patrem & Filium , &
fons omnis sanctitatis , potissimum con-
sistentis in charitate. Est Spiritus deni-
que unus & unicus , quia esse plures Spi-
ritus sanctos , est impossibile. Est tamen
etiam Spiritus multiplex , ut Isaias ait :
Spiritus sapientia & intellectus , Spiritus
consilii & fortitudinis , Spiritus scientia &
pietatis , & Spiritus timoris Domini. cap.
II. 17.

Suspiria.

O Spiritus eterne , imprime mihi alta
illa æternitatis principia & lumina,
quibus Sanctos illustrasti ! O divine Spi-
ritus,

ritus, da ut spiritus meus, à Spiritu tuo
 ducatur ac regatur! O Spiritus Sancte
 esto mihi impulsus & impetus assiduus
 dilectionis, perfectionis & sanctitatis!
 O Spiritus *une & multiplex!* largire mihi
 septena dona tua. Adversus *stultitiam*
arma me spiritu sapientia; contra *rudita-*
tem, spiritu intellectus, contra *precipitan-*
tiam, spiritu consilii; contra *ignorantiam,*
spiritu scientia; contra *pusillanimitatem,*
spiritu fortitudinis; contra *cordis duri-*
tiam, spiritu pietatis; contra *superbiam,*
spiritu timoris Domini. S. Gregor. L. 2.
 Moral. c. 26. Ut tibi constanter adhæ-
 ream, & unus quodammodo tecum spi-
 ritus evadam: nam *Qui adheret Domi-*
no, unus spiritus est. I. Corinth. c. 6. 16.

17. Martii.

I. Spiritus sanctus, est æternè sanctus, &
sanctitas æterna, cùm enim forma-
 lis sanctitas consistat in cognitione & a-
 more ipsius, & ipse seipsum ab æterno
 cognoscat & amet, atque in æternum
 cogniturus & amaturus sit; patet ejus
 sanctitatem esse æternam: ipsumque esse
 æter-

210 *Domus aternitatis. Consideratio*
æternam, immensam & infinitam san-
ctitatem, cum ipse sit sui cognitio, amor
& fruitio, æterna, immensa & infinita.

II. Igitur Spiritus sanctus est *amor æ-*
ternus; quia ejus principium seu produ-
cens ac spirans est amor æternus: *Deus*
charitas est. 1. Joan. c. 4. 8. Ejus quoque
processio, est amor æternus; quia dile-
ctio mutua Patris & Filii est. Denique
ipse Spiritus sanctus, amor est æternus,
eâ dilectione spiratus; illud enim, quod
dilectione emanat, non aliud, quam a-
mor est. Hac de causa idem ille Spiritus
divinus supra Apostolos in linguis igneis
apparuit; quia amor est, ab æterno ar-
dens, & in tempore statuto, corda disci-
pulorum inflammans.

III. Quia Spiritus sanctus, *amor æter-*
nus est; hinc quoque æternum basium
est, quo Pater Filium, Filius Patrem ab
æterno osculatur. Æternus ardor est,
quo mutuos in amores effervescent:
halitus est, quo se afflant, complexus est,
quo se jungunt, unio quâ se nectunt, vin-
culum quo se ligant, nodus quo se strin-
gunt, ignis æternus, ad cujus incendium

Pater

Pater in Filium ; Filius in Patrem, mutuâ dilectione eliquatur : lingua est, quâ se mutuò alloquuntur : echo est, quæ Patri ex Filio & Filio ex Patre , non alio respondet *clamore* , quàm *amore* ; idque totâ æternitate.

Suspiria amorosa.

O Spiritus sancte, sanctifica me in veritate! ô amor æterne accende me sincerâ dilectione! O ignis qui semper ardes, & nunquam extingueris! ô ardor, qui semper ferves & nunquam tepescis! inflamma me, ut diligam te, toto corde, toto me, toto te, propter te, dignè te! Tu basium es, osculare me ; complexus es, amplectere me; unio es, uni me, vinculum es, liga me, nodus es, stringe , & astringe me tibi arctissimè : lingua es, linguæ donum tribue; echo es, da ut clamori & amori tuo, amor meus, plus amando, quàm clamando respondeat; ut te, ac spiritu tuo replear. Eo enim fine *Charitas Dei diffusa est in cordibus nostris, per Spiritum sanctum, qui datus est nobis.* Rom. c. 5.

18. *Martii.*

I. **D**Enique Spiritus sanctus, est, *Sanctificator* : sicut enim ab æterno statuit decrevitque ; ita in tempore homines sanctificat, ut sint sancti Deo suo, non exiguo tempore , non in præsentè duntaxat sæculo , sed sint sancti in æternum, in domo sanctitatis cœlesti : quam *decer sanctitudo*. Ipse namque est causa & origo omnis sanctitatis, viæ & patriæ, hominum & Angelorum : omnis enim sanctitas ab ipso tanquam æterno & inexhausto fonte puritatis, perfectionis & sanctitatis scaturit.

II. Ipse enim Spiritus sanctus nos mundat à peccatis : *Effundam super vos aquam mundam & mundabimini ab omnibus inquinamentis vestris. Ezech. c. 36. 25.* Ipse peccata, quibus infinitam Dei Majestatem offendimus, condonat, labes abstergit, animas purgat & sanctificat. Ipse cognitione supernaturali mentes illuminat, charitatem infundit, seipsum donat, suâ suavitate allicit, dulcedine inescat, bonitate recreat, liberalitate ditat,
poten-

potentiâ protegit, sapientiâ dirigit, puritate emundat, gaudio consolatur.

III. Quare meritò nuncupatur quoque *Bonitas*, fons & abyssus bonitatis, bona faciens omnia, benefaciens omnibus, bonos faciens omnes, bona excedens omnia. Summa voluptas, ubertas, repletio, satietas, delectatio, dulcedo, amœnitas, benignitas, pietas: quæ nos hîc inchoatè sanctificatos, ad supremam atque completam evehit sanctitatem, infundendo lumen gloriæ; quo omnes Deum triunum, modo altissimo, cognoscant, ac diligant. Altissima enim, intrinseca & realis sanctitas, in altissima Dei, cognitione, dilectione & fruitione consistit.

Aspirationes.

O Sanctificator optime! Spiritus increate, largitor veniæ, collator gratiæ, munda nos ab omni inquinamento carnis & spiritûs! effice nos à peccatoribus justos, ex infirmis fortes, ex tristibus lætos, ex frigidis ferventes, ex iracundis mites, ex ignorantibus sapientes, ex timidis

214 *Domus aternitatis. Consideratio*
dis animosos, ex imperfectis, perfectos
& sanctos. O aeterna sanctitas! voluptas,
ubertas & amœnitas, ex inchoata hujus
vitæ sanctimonia, deduc nos ad sancti-
tatem perfectissimam cœlestis patriæ, ut
ibidem Te, uti & Patrem ac Filium; fa-
cie ad faciem videamus, amemus & lau-
demus in sæcula.

CONSIDERATIO XXVII.

Æternitas Christi JESU Regis nostri.
Regnabit in Domo Jacob in aeternum, &
regni ejus non erit finis. Luc. c. 1. 32.

19. Martii.

I. **C**onsidera primò regnum Christi:
nam Christus Dominus ac Re-
demptor noster possidet regnum, & qui-
dem aeternum, juxta verba Archangeli,
Regnabit in Domo Jacob in aeternum, &
regni ejus non erit finis. l. c. Regnabit in
Domo Jacob, id est in Ecclesia, sive in po-
pulo fideli, qui olim Christo nascente
erat populus Israel, seu filii & posterii
Jacob. Hoc regnum in Davide tempo-
rale fuit; sed in Christo spirituale &
æter-